

## الفائز

بدأ الزمن يتعد بالناقص  
و الورقة وصلت إيدي متأخر  
مع انى أول حد كان موجود  
كراسة الإجابات متسطرة بحدود  
و ورقها جاهز لاحتضان الحَل  
مَل الورق م الانتظار  
و الانتظار من حيرتي مَل  
سَمِيَّت ..

دفت إيديا ف بعضها .. و بديت  
من غير وصاية حد .. و لا توصيه  
كان السؤال  
من بره منهج الإعتراف بالذنب

فقتلني إحساس الجَهر بالمعصيه  
مع إني حافظ الكلام بالنص  
و بدأت أَرص الرص فى الورقة  
وكل اما أزود فى الكلام ينقّص  
و النص كل ما يتملي .. ببيكش  
و الوقت سيف  
مقدرتش إني أقطعه  
و مقدرتش إني أغش  
و الكل بيطنش  
و كأن فوق رووسهم معشش طير  
مش عايز أخذ منهم ولا عايز اكتب دَش  
شرف المحاوله .. أشرف من التزوير  
و يفيد بأيه يعني النجاح الهَش  
فات م الزمن أكثر من اللى فاضلي  
ضلي و انا متسمرين فى التخت  
و الاسئله كانت كثير و كثير  
عن صحبتي و عن السنين و البخت

قصر الكلام ..  
بعد البدايه الأكليشيه  
معرفش ليه  
عكيت اوي و لبخت  
متبقى من باقي الزمن ايام  
و البعض لملم أمنياته و قام  
و أنا قلمي لسه ف حالة إستسلام  
الإمتحان فى مستوى البني ادم العادي  
لكنه كان أصعب من إني أحل  
و الحمل كان اتقل من التلخيص  
او انه ممكن يتعمل برشام